

В СУББОТУ 4-Й СЕДМИЦЫ ПО ПАСХЕ

В ПЯТОК 4-Я СЕДМИЦЫ ПО ПАСЦЕ, ВЕЧЕРА,

Обычная кафисма.

На Господи воззвах, стихиры праздника 3. Глас 1-й:

Подобен: Небесных чинов:

Творец всех и жизни Податель, Отцу Божественному соприисносущное Слово, волею от Девы плоть приим, быв Человек, неизреченныя премудрости, яко Благ всем источи учения.

Празднику преполовившуся иудейскому Христе, во святилищи предстал еси, закону Владыка, уча властию, и книжники обличая, якоже писано есть, и устрашая премудростию словес Твоих, и чудес показаньми.

Податель премудрости, и добрых излиятель, изливаяй Божественныя струи от источника приснотекущаго, приидите ко Мне, зовет, воду жизни жаждущии почерпите, и реки из чрева вашего, глаголет, дарований Божественных потекут.

И Миней 3.

Слава: глас 1-й: Иоанна монаха:

Пятидесятницы наста дней преполовление, в немже Христос обнажив маловидно Божественную силу, расслабленного стягну словом, того от одра возставив, и боголепно чудотворя в зданном теле, человеком дарова вечный живот, и велию милость.

И ныне: Богородичен, глас 3-й:

Како не дивимся Богомужному Рождеству Твоему, Пречестная? Искушения бо мужескаго не приемши Всенепорочная, родила еси без отца Сына плотию прежде век от Отца рожденного без матери, никакоже претерпевшаго изменения, или смешения, или разделения, но обою существу свойство цело сохраняшаго. Темже Мати Дево Владычице, Того моли спастися душам, православно Богородицу исповедающих Тя.

На стиховне стихиры Осмогласника. глас 3-й:

Твоим Крестом Христе Спасе, смерти держава разрушися, и диаволя прелесть упразднися: род же человеческий верою спасаемый, песнь Тебе всегда приносит.

Стих: Господь воцарися, * в лепоту облечеса.

Просветишася всяческая, Воскресением Твоим Господи, и рай паки отверзся, вся же тварь восхваляющи Тя, песнь Тебе всегда приносит.

Стих: Ибо утверди вселенную, * яже не подвижится.

Славаю Отца и Сына силу, и Духа Святаго пою власть, нераздельное, несозданное Божество, Троицу Единосущную, царствующую в век века.

Стих: Дому Твоему подобает святыня * Господи, в долготу дний.

Страстию Твоею Христе, омрачивый солнце, и светом Твоего Воскресения, просветивый всяческая, приими нашу вечернюю песнь Человеколюбче.

Слава, и ныне: глас 1-й:

Во святилище пришел еси Премудросте Божия, преполовляющуся празднику, уча и обличая непокоривыя иудеи, фарисеи и книжники, и вопия со дерзновением к ним: жаждай да грядет ко Мне, и пьет воду животную. И не вжаждет в век. Веруй Моей благодати, реки потекут из чрева его жизни вечныя. О благодати и благоутробия Твоего Христе Боже наш, слава Тебе.

По Ныне отпускаеши: и по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источнике жизни нашея, Христе Боже, слава Тебе.

[Слава: святого, аще имать. И ныне: празднику]

Ектения, и отпуст.

В СУББОТУ 4-Й СЕДМИЦЫ ПО ПАСХЕ

В СУББОТУ 4-Я СЕДМИЦЫ ПО ПАСХЕ, НА УТРЕНИ.

На Бог Господь: тропарь праздника глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе. [Трижды]

По 1-м стихословии седальны воскресны, глас 3-й:

Христос от мертвых воста, начаток усопших, перворожден твари, и Содетель всех бывших, истлевшее естество рода нашего в Себе Самом обновил: не кому смерти обладавши, ибо всех Владыка державу твою разруши.

Стих: Воскресни Господи Боже мой, да вознесется рука Твоя * не забуди убогих Твоих до конца.

Плотию смерти вкусивый Господи, горесть смерти пресекл еси востанием Твоим, и человека на ню укрепивый, первыя клятвы одоление призывая: защитниче жизни нашея, Христе Боже, слава Тебе.

Слава, и ныне: Богородичен:

Тя ходатайствовавшую спасение рода нашего воспеваем Богородице Дево: плотию бо от Тебе восприятою Сын Твой, и Бог наш, Крестом восприим страсть, избави нас от тли, яко Человеколюбец.

По 2-м стихословии, седален глас 8-й:

Подобен: Премудрости:

Празднику преполовившуся законному, был еси уча Спасе мой во святилищи, и обличая безумие неверных евреев, и вопия к народом Божественным гласом, яко Человеколюбец: жаждай, зывал еси, да грядет ко Мне и пьет. Темже обещал еси верующим подати веселия воды от источника нетленного. Сего ради вопием Ти: низпосли Христе Боже Духа Твоего Святаго, и спаси нас, яко един еси Многомилостивый.

Слава, и ныне: тойже.

Воскресение Христово: псалом 50. Каноны праздника, со ирмосы на 6, и святого обители на 4, и Миней на 4. Кондак, и ексапостиларий праздника.

Песнь 1.

Ирмос: Моря Чермнаго пучину, * немокрыми стопами * древле шествовав Израиль, * крестообразно Моисеовыма рукама, * Амаликову силу в пустыни победил есть.

Запев: Слава Тебе Боже наш, слава Тебе

Велия яже паче ума, Твоего Владыко божественною воплощения благодеяния сияют нам, дарове же и благодати, и божественныя светлости, благоподатно истекают.

Пришел еси Христе, светлости Божества испущая, праздника посреди явленно: праздник бо радостен спасаемым еси, и спасения нашею ходатай.

Премудрость и правда, Господи, и избавление, от Бога Ты бысть нам, и от земли к небесней приводя высоте, и Дух Божественны даруя.

Плоть Твоя истления во гробе не виде Владыко, яко составися кроме семене, тления не прият исследованием естества, пресуществене, не работавши.

И святаго обители на 4, и Миней на 4

Песнь 3.

Ирмос: Веселится о Тебе церкви Твоя Христе зовущи, * Ты ми крепость Господи, * прибежище и утверждение.

Вод животворных, церкви источник отверзл еси, аще кто жаждет, усердно да приходит и пьет, вопия Блаже.

Вод животворных, церкви источник отверзл еси, аще кто жаждет, усердно да приходит и пьет, вопия Блаже.

От земли убо, на небо вознестися, проявление глаголаше, с небесе же Духа послати обетова Святаго.

Иже естеством животворивый, иже от Девы родивыйся Господь, всем верным дарует безсмертие, яко Благоутробен.

И святаго обители на 4, и Миней на 4

Кондак, Икос, и Седален святаго. Таже:

Слава, и ныне. Седален, глас 8-й.

Стоя посреди святилища, * преполовляющуся божествене празднику, * жаждай зываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Яко иже верует в Мя, посланнаго от Божественнаго Родителя, * со Мною прославится. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим.

Песнь 4.

Ирмос: Воздвижена Тя видевши церкви на кресте, * Солнца Праведнаго, * ста в чину Своем, * достойно зывающе, * слава силе Твоей Господи.

Растерзав смерти врата Своею силою, пути жизни сказал еси, и безсмертия двери отверзл еси, иже верою Тебе зовущим, слава силе Твоей Господи.

Преполовление всех и конец имея, и начало яко Безначален обдержа, стал еси посреди вопия, божественных, богомудрии, даров насладитесь.

Яко Бог всех держа власть, яко силен державу низложив смерти, послати обеща Христе Дух Святыи, иже от Отца происходящий.

Даеши богато благодать Тебе поющим, и иже из Тебе Рожьшагося Превечнаго Слова, Мати неискусомужная, и согрешением оставление, сим просящи Пречистая.

И святаго обители на 4, и Миней на 4

Песнь 5.

Ирмос. Ты Господи ми свет, * в мір пришел еси, * во свет святых обраща, * из мрачна неведения, * верою хвалящих Тя.

Божественных праздник преполовение достигше, совершенное божественныя добродетели постигнути, потщимся богомудрии.

Божественных праздник преполовение достигше, совершенное божественныя добродетели постигнути, потщимся богомудрии.

Яко воистину священно, настоящее торжество, преполовение бо великих праздник, повелевает и светится обоюду.

Ум ангельский не может разумети Твое не изреченное из Девы, и пречистое Рождество, Спасе мой Всесилне.

И святого обители на 4, и Миней на 4

Песнь 6.

Ирмос. Пожру Ти со гласом хваления Господи, * церкви вопиет Ти, * от бесовския крове очищися, * милостию от ребр истекшею Ти кровию.

Преполовение пятидесятницы наста днесь: отсюда божественная убо Пасха, святая светится, просвещаючи божественнейшею светлостию, от онуду же Утешителевою благодатию осиявающи.

Преполовение пятидесятницы наста днесь: отсюда божественная убо Пасха, святая светится, просвещаючи божественнейшею светлостию, от онуду же Утешителевою благодатию осиявающи.

Глаголаше в церкви Христе предстоя, иудейским собором Свою славу открывая, и предъявляя сродство к Родителю.

Буди ми Предстательница, и Стена нерушимая, от мірских мя соблазн избавляючи, едина Богородительнице, и божественным светолитием освещаючи.

Троицен: Единое в Троице Божество, Существо триипостасное, несозданное, нераздельное вси славим, Отца, и Сына, и Святого Духа, яко три сущее, и единое.

Богородичен: Деву по рождестве поем Тя, Деву и Матерь славим Тебе едину, Чистая Богоневесто Отроковице, из Тебе бо воистинну Бог воплотися, обновив нас.

И святого обители на 4, и Миней на 4

Кондак, глас 4-й.

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду безсмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Икос. Олядевшую ми душу согрешенми и беззаконии, кропленьми Твоих кровей напой, и покажи плодоносна добродетельми. Ты бо рече всем приходящим к Тебе, слово Божие пречистое, воду нетления почерпите, живу же и очищающую грехи, поющим славное и божественное Твое востание, подая Благии иже с высоты сошедшую воистину учеником Твоим Духа крепость, Тебе Бога ведущим, Ты бо еси источник животу нашему.

Песнь 7.

Ирмос. В пещи Авраамския дети персьстей, * любовию благоверия паче, * нежели пламенем опаляеми взываху, * благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Крепость Спасе смертную разорь силою, стези жизни показал еси человеком, благодарно Тебе зовущим, благословен еси в церкви славы Твоей Господи.

Плоть носяща видяще, не разумеша собори еврейстии слова Тебе Божия. Но мы Тебе воспеваем, благословен еси в церкви славы Твоей Господи.

Вышняго освященно Божие селение, радуйся. Тобою бо дадеша радость Богородице, вопиющим Ти, благословена Ты в женах, всенепорочная Владычице.

И святого обители на 4, и Миней на 4

Песнь 8.

Ирмос. Руце распростер Даниил, * львова зияния в рове затче: * огненую же силу угасиша, * добродетелию преноясавшися, * иже благочестия любителие отроцы взывающе, * благословите вся дела Господня Господа.

Красен из гроба встав, Своєю Божества славою сияя, апостолом Своим Господи явил еси Духа обещание, тем посылая действо, благословите вся дела Господня Господа.

Умертвив ада яко Бог, Живоначалниче, всем источил еси живот вечный. Его же ныне воображают светлейше, светоносных дней сих, радостно вопиющим, благословите вся дела Господня Господа.

Яко солнце Христе правде явися, заря миру послал еси апостолы Своя, носяща Тебе света безсеменного, и неразумия мглу очищающа, вопиющим, благословите вся дела Господня Господа.

Се ныне оскуде яве, от иудина племени князь и вождь: Ты бо Всенепорочная родила еси, прежде обещавшаго обетования, иже Христа Бога поющим, благословите вся дела Господня Господа.

И святого обители на 4, и Миней на 4

И стихословим Честнейшую

Песнь 9.

Ирмос. Камень нерукосечныя горы, * от несекомыя Тя Девицы, * краеугольный отсечися Христос, * и совокупив разстоящая естества: * тем веселящися, Тя Богородице величаем.

Новому и чистому житию, от Христа научившися, сие даже до конца сохранит, полезно вси потщимся, яко да Святого Духа пришествие приимем.

В небесное паки житие звани бывши, ходатайственною силою, изливавшася даже до рабия образа, и нас вознесшаю, Сего достойно величаем.

Ты мое смертное Живодавче, обложением безсмертия, и нетления благодатию оболк Спасе, воскресил сей, и Отцу привел сей, временную ми разрушив брань.

Яко корень источника, и вину нетления, Тебе Дево вси вернии уведевше, похвалами почитаем. Ты бо составное бсзсмертие источила еси.

И святаго обители на 4, и Миней на 4

Катавасия: Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

Светилен.

Подобен: Небо звездами:

Жаждай взываше, да грядет ко Мне и пьет, * пияи бо от сея Божественныя Моея воды, * реки из чрева источит повелении Моих. * Сего ради вопием Ти, * слава Тебе Христе Боже, * яко богато излиал еси воды Твоего человеколюбия рабом Своим. [Дважды.]

Слава, и ныне: тойже

На хвалитех поставим стихи 4, и поем стихиры воскресны, глас 3-й:

Приидите вси языцы, уразумейте страшныя тайны силу: Христос бо Спас наш, еже в начале Слово, распяты нас ради, и волею погребеша, и воскресе из мертвых, еже спасти всяческую, Тому поклонимся.

Поведаша вся чудеса стражие Твои Господи: но собор суеты исполни мздою десницу их, скрыти мняше Воскресение Твое, еже мир славит: помилуй нас.

Радости вся исполнишася, Воскресения искус приимша. Мариа бо Магдалина ко гробу прииде, и обрете ангела на камени сядяща, ризами блистающася, и глаголюща: что ищите Живаго с мертвыми? Нестъ zde, но воста, якоже рече, предваря вы в Галилеи.

Во свете Твоем Владыко, узрим свет Человеколюбче: воскресл бо еси из мертвых, спасение роду человеческому даруяй, да Тя вся тварь славословит единого безгрешнаго: помилуй нас.

Слава, и ныне: глас 4-й: Анатолия:

Просветившеся братие Воскресением Спаса Христа, и достигше преполовления праздника Владычня, приискренно сохраним заповеди Божия, да достойни будем и Вознесение праздновати, и пришествие получитьи Святаго Духа.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры подобны, глас 2-й:

Подобен: ДOME Евфрафов:

Текущий источник * Твоя премудрости, * воду духовную источает, * юже пьюще, догмат Божественных * исполняемся.

Стих: Помяни сонм Твой:

Уязвляшеся лютей * еврейский род воистинну, * слыша Тя Слове, * научающа народы * спасительным учением.

Стих: Бог же Царь наш, прежде века:

Пришел еси Содетелю * на Сион, * и стал еси посреде * людей Твоих, и людем дал еси * благодать спасительную.

Слава, и ныне: глас 4-й:

Господи, прежде честнаго Твоего Креста, празднику преполовившуся, во святилище вшел еси, иудеи со дерзновением уча, Моисеем и в законе Тобою законоположенным. Ужасающесе же Христе Твоя премудрости неизреченному таинству, еже на Тя роптанию в себе завистию поучахуся. Како Сей вестъ писмена не учився? Не ведяще Тебе Спаса душ наших.

Таже, Благо есть исповедатися Господеви

Трисвятое. И по Отче наш:

Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жаждай да грядет ко Мне и да пьет. * Источниче жизни нашея, Христе Боже, слава Тебе.

Таже ектения: Помилуй нас Боже:

Час 1. И отпуст.

В СУББОТУ 4-Й СЕДМИЦЫ ПО ПАСХЕ

На Литургии

Блаженна от канона праздника, Песнь 5-й, 4-го гласа, на 6:

Ты Господи ми свет, в мир пришел еси, во свет святых обраща, из мрачна неведения, верою хвалящих Тя. [Дважды.]

Божественых праздник преполовение достигше, совершенное божественныя добродетели постигнути, потщимся богомудрии. [Дважды.]

Слава ..., **Я**ко воистину священно, настоящее торжество, преполовение бо великих праздник, повелевает и светится обоюду.

И ныне ..., **У**м ангельский не может разумети Твое не изреченное из Девы, и пречистое Рождество, Спасе мой Всесилне.

По входе Тропарь празднику, глас 8-й:

Преполовившуся празднику, * жаждущую душу мою благочестия напой водами, * яко всем, Спасе, возопил еси: * жагдай да грядет ко Мне и да пьет. * Источниче жизни нашея, Христе Боже, слава Тебе.

И храма Богородицы, и храма святого. Посем настоящего святого, аще есть. Таже кондак храма святого. Слава: святого:

И ныне: праздника: Кондак, глас 4-й:

Празднику законному преполовившуся, * всяческих Творец и Владыка, * к предстоящим глаголаше Христе Боже: * приидите и почерпите воду безсмертия. * Тем же Ти припадаем и верно вопием, * щедроты Твоя даруй нам. * Ты бо еси источник животу нашему.

Прокимен апостола, глас 3-й:

Велий Господь наш, и велия крепость Его, * и разума Его несть числа.

Стих: Хвалите Господа яко благ псалом: Богови нашему да усладится хваление.

Апостол Деяний, зачало 29. [Деян. 12, 1 – 11.]

Во дни оны, возложи Ирод царь руже озлобити некия иже от церкви, Уби же Иакова, брата Иоаннова, мечем: И виде, яко годя есть иудеем, приложи яти и Петра: бяху же дние опресночнии: Егоже и емь всади в темницу, предав четверем четверицам воинов стрещи его, хотя по Пасце извести его к людем. И убо Петра стражаху в темнице: молитва же бе прилежна бываемая от церкви к Богу о нем. Егда же хотяше его извести Ирод, в нощи той бе Петр спя между двема воинома, связан (железнома) ужема двема, стражие же пред дверьми стражаху темницы. И се, ангел Господень предста, и свет возсия в храме: толкнув же в ребра Петра, воздвиже его, глаголя: востани вскоре. И спадоща ему ужа (железная) с руку. Рече же ангел к нему: препояшися и вступи в плесницы твоя. Сотвори же тако. И глагола ему: облещися в ризу твою и последуй ми. И изшед вслед его идяше и не ведаше, яко истина есть бывшее от ангела, мняше же видение зрети. Прошедша же первую стражу и вторую,

приидоста ко вратом железным, вводящим во град, яже о себе отверзошася има: и изшедша преидоста стогну едину, и абие отступи ангел от него. И Петр быв в себе, рече: ныне вем воистинну, яко посла Бог ангела Своего и изъят мя из руки Иродовы и от всего чаяния людей Иудейских.

Аллилуа глас 1-й: Помяни сонм Твой, егоже стяжал еси исперва.

Стих: Бог же Царь наш прежде века, содела спасение посреде земли.

Евангелие Иоанна, зачало 31. [Ин. 8, 31 – 42.]

Рече Господь к веровавшим Ему иудеом: аще вы пребудете во словеси Моем, воистинну ученицы Мои будете: И уразумеете истину, и истина свободит вы. Отвещающа (и реша) Ему: семя Авраамле есмы, и никомуже работахом николиже: како Ты глаголеши, яко свободни будете? Отвеща им Иисус: аминь, аминь глаголю вам, яко всяк творяй грех раб есть греха: Раб же не пребывает в дому во век: сын пребывает во век: Аще убо Сын вы свободит, воистинну свободни будете: Вем, яко семя Авраамле есте: но ищите Мене убить, яко слово Мое не вмещается в вы: Аз, еже видех у Отца Моего, глаголю: и вы убо, еже видите у отца вашего, творите. Отвещающа и реша Ему: отец наш Авраам есть. Глагола им Иисус: аще чада Авраамля бысте были, дела Авраамля бысте творили: Ныне же ищите Мене убить, Человека, Иже истину вам глаголах, юже слышах от Бога: сего Авраам несть сотворил: Вы творите дела отца вашего. Реша же Ему: мы от любодеяния несмы рождени: единого Отца имамы, Бога. Рече же им Иисус: аще Бог Отец ваш (бы) был, любили бысте (убо) Мене: Аз бо от Бога изыдох и приидох: не о Себе бо приидох, но Той Мя посла.

Вместо же Достойно, поем ирмос 9-й, глас 8-й:

Ирмос: Чужде матерем девство, * и странно девам деторождение: * на Тебе Богородице, обоя устроишася. * Тем Тя вся племена земная * непрестанно величаем.

Причастен: Ядый Мою Плоть, и пияй Мою Кровь, во Мне пребывает, и Аз в нем, рече Господь. Аллилуа, [трижды.]